

舊五代史

一二



舊五代史卷七十五

宋司空同中書門下平章事薛居正等撰

高祖紀第一

晉書一

高祖聖文章武明德孝皇帝姓石諱敬瑭太原人也本
衛大夫碯漢丞相奮之後漢衰關輔亂子孫流汎西裔
故有居甘州者焉四代祖璟以唐元和中與沙陀軍都
督朱耶氏自靈武入附憲宗嘉之隸爲河東陰山府裨
校以邊功累官至朔州刺史天福二年追尊爲孝安皇
帝廟號靖祖陵曰義陵祖妣秦氏追諡爲孝安元皇后
三代祖郴早薨贈左散騎常侍追尊爲孝簡皇帝廟號

肅祖陵曰惠陵祖妣安氏追諡孝簡恭皇后皇祖諱翌
任振武防禦使贈尙書右僕射追尊孝平皇帝廟號睿
祖陵曰康陵祖妣米氏追諡孝平獻皇后皇孝諱紹雍
案原本作詔雍今番字臬振雞善騎射有經遠大畧事
從五代會要改正
後唐武皇及莊宗累立戰功與周德威相亞歷平洺二
州刺史薨於任贈太傅追尊爲孝元皇帝廟號憲祖陵
曰昌陵皇妣何氏追諡孝元懿皇后帝卽孝元之第二
子也以唐景福元年二月二十八日生於太原派陽里
時有白氣充庭人甚異焉及長性沈澹寡言笑讀兵法
重李牧周亞夫行事唐明宗爲代州刺史每深心器之

因妻以愛女唐莊宗聞其善射擢居左右明宗請隸大

軍從之後明宗從莊宗征行命帝領親騎號三討軍

案歐

陽史作左射軍

倚以心腹天祐十二年莊宗併有河北之地開

府於鄴梁遣上將劉鄩以兵五萬營於莘十三年二月

鄩引兵突至清平薄於城下莊宗至自甘陵兵未陣多

爲鄩所掩帝領十餘騎橫槊深入東西馳突無敢當者

卒全部伍而旋莊宗壯之拊其背曰將門出將言不謬

爾因頒以器帛復親爲啗酥當時以爲異恩由是知名

明年鄩兵陣於莘之西北明宗從莊宗酣戰久之塵埃

四合帝與明宗俱陷陣內帝挺身躍劍反復轉鬪行數

十里逐鄆於故元城之東是日鄆軍殺傷過半十五年唐軍拔楊劉鎮梁將賀瓌設伏於無石山明宗爲瓌所迫帝爲後殿破梁軍五百餘騎按轡而還十二月莊宗與梁軍大戰於胡柳陂眾號十萬總管周德威將左軍雜以燕人前鋒不利德威死之莊宗率步眾五千固守高陵以避敵之銳明宗獨完右廣伏於土山之下顧謂帝曰梁人首獲其利旌旗甚整何計可以挫之帝曰臘後寒如此出手墮指彼多步眾易進難退莫若啜構飲水徐而困之且超乘徒行其勢不等一擊而破期在必勝明宗曰是吾心也會日暮梁軍列於平野五六萬人

爲一方陣麾游騎以迫唐軍帝曰敵將遁矣乃請明宗
令士整冑寬而羅之命左射軍二百人鳴矢馳轉漸東
其勢以數千騎合之迨夜旌旗皆靡而一角先潰三面
踵之其牙竿相擊若火爆之聲橫屍積甲不可勝計由
是梁人勢削莊宗進營德勝渡十八年十月又從明宗
戰梁人於德勝渡敗其將戴思遠殺二萬餘人十九年
戰胡盧套唐軍稍卻帝睹其敵銳拔劍闢道肩護明宗
而退敵人望之無敢襲者二十年十月從明宗觀梁人
之楊村寨部曲皆不擐甲俄而敵出不意以兵掩明宗
刃將及背帝挾戰戟而進一擊而凶酋落馬者數輩明

宗遂解其難是歲莊宗卽位於鄴改元同光遣明宗越河懸軍深入以取鄆鄆人始不之覺帝以五十騎從明宗涉濟突東門而入鄆兵來拒帝中刃翼明宗羅兵通衢巖然不動會後騎繼至遂拔中城以據之旣而平汴水滅梁室成莊宗一統集明宗大勲帝與唐末帝功居最莊宗朝官未顯者以帝不好矜伐故也唯明宗心知之同光四年二月趙在禮據鄴爲亂朝廷遣元行欽招之不下羣議紛然以爲非明宗不可莊宗乃以明宗爲統帥時帝從行至魏諸軍有變叩馬請明宗帝河北明宗受霍彥威勸將自訴於天子遂佯諾諸軍亦恐事不

果而散者甚眾明宗所全者唯常山一軍而已西次魏縣帝密言於明宗曰猶豫者兵家大忌必若求訴宜決其行某願率三百騎先趨汴水以探虎口如遂其志請大軍速進夷門者天下之要害也據之可以自雪安有上將與三軍言變他日有平手乎危在頃刻不宜恬然明宗至相州遂分驍騎三百付之遣帝由黎陽濟河自汴西門而入因據其城及明宗入汴莊宗親統師亦至城之西北五里登高歎曰吾不濟矣由此莊宗從兵大潰來歸明宗明宗尋遣帝令率兵爲前鋒趨汜水關俄而莊宗遇內難而崩是月明宗入洛嘉帝之功自總管

府都校署陝府兵馬留後明宗卽位改元天成五月加
帝光祿大夫檢校司徒充陝州保義軍節度使歲未期
而軍民之政大治焉二年二月加檢校太傅兼六軍諸
衛副使進封開國伯增食邑八百戶是月帝赴闕以倅
六軍諸衛事故也四月加食邑八百戶實封一百戶旌
爲政之效也十月明宗幸汴以帝爲御營使車駕次京
水飛報汴州節度使朱守殷叛明宗命帝董親軍倍道
星行信宿及浚城一戰而拔之尋以帝爲宣武軍節度
使侍衛親軍步軍都指揮使兼六軍諸衛副使進封開
國公加食邑五百戶賜耀忠匡定保節功臣四月車駕

還洛制加檢校太傅同中書門下平章事興唐尹鄴都
留守天雄軍節度使五月丁未加駙馬都尉長興元年
二月明宗南郊禮畢加檢校太尉增食邑五百戶尋詔
歸任時鄴都繁富爲天下之冠而土俗獷悍民多爭訟
帝令投函府門一一覽之及踰年盈積几案滯於獄者
甚眾時論以此減之九月東川董璋叛朝廷命帝爲東
川行營都招討使兼知東川行府事十月至自魏博董
眾西征二年春以川路險艱糧運不繼詔班師四月復
兼六軍諸衛副使六月改河陽節度使仍兼兵柄是時
秦王從榮奏伏見北面頻奏報契丹族帳近塞吐渾突

厥已侵邊地戍兵雖多未有統帥早宜命大將一人以
安雲朔明宗曰卿等商量從榮與諸大臣奏曰將校之
中唯石敬瑭康義誠二人可行帝素不欲爲禁軍之副
卽奏曰臣願北行明宗曰卿爲吾行事無不濟及受詔
不落六軍副使帝復遷延辭避十一月乙酉明宗復謂
侍臣曰雲州奏契丹自幽州移帳言就放牧終冬不退
其患深矣樞密使范延光奏曰已議石敬瑭與康義誠
北行然其定奪卽在宸旨帝奏曰臣雖不才爭敢避事
但進退惟命明宗曰卿爲吾行甚叶眾議由是遂定丁
亥加兼侍中太原尹北京留守河東節度使兼大同振

武彰國威塞等軍藩漢馬步軍總管改賜竭忠匡運寧國功臣翌日宴於中興殿帝捧觴上壽因奏曰臣雖微怯惟邊事敢不盡其忠力但臣遠違玉階無以時申補報帝因再拜告辭明宗泣下霑衿左右怪其過傷果與帝因此爲訣遂不復相見矣十二月明宗晏駕帝聞之長慟若喪考妣應順元年正月閔帝卽位加中書令及增食邑帝性簡儉未嘗以聲色滋味輒自宴樂每公退必召幕客論民間利害及刑政得失明而難犯事多親決有店婦與軍士訟云曝粟於門爲馬所食而軍士懇訴無以自明帝謂鞠吏曰兩訟未分何以爲斷可殺馬

剗腸而視其粟有則軍士誅無則婦人死遂殺馬馬腸
無粟因戮其婦人境內肅然莫敢以欺事言者三月移
鎮常山所歷方鎮以孝治爲急見民間父母在昆弟分
索者必繩而殺之勤於吏事廷無滯訟常山屬邑曰九
門有人鬻地與異居兄議價不定乃移于他人他人須
兄立券兄固抑之因訴于令令以弟兄俱不義送府帝
監之曰人之不義由牧長新至教化所未能及吾甚愧
焉若以至理言之兄利良田弟求善價順之則是沮之
則非其兄不義之甚也宜重笞焉市田以高價者取之
上下服其明及岐陽兵亂推潞王爲天子閔帝急詔帝

赴闕欲以社稷爲託閔帝自洛陽出奔於衛相遇於途
遂與閔帝迴入衛州時閔帝左右將不利於帝帝覺之
因擒其從騎百餘人閔帝知事不濟與帝長慟而別帝
遣刺史王弘贄安置閔帝於公舍而去尋爲潞王所害
帝後長以此愧心焉清泰元年五月復授太原節度使
北京留守充大同振武彰國威塞等軍蕃漢馬步總管
二年夏帝屯軍於忻州朝廷遣使送夏衣傳詔撫諭後
軍人遽呼萬歲者數四帝懼斬挾馬將李暉以下三十
餘人以徇乃止三年五月移授鄆州節度使進封趙國
公仍改扶天啟運中正功臣尋降詔促帝赴任帝心疑

之乃召僚佐議曰孤再受太原之日主上面宣云與卿
北門一生無議除改今忽降此命莫是以去年忻州亂
兵見迫過相猜乎又今年千春節公主入覲當辭時謂
公主曰爾歸心甚急欲與石郎反耶此疑我之狀固且
明矣今天子用后族委邪臣沈湎荒惑萬機停壅失刑
失賞不亡何待吾自應順中少主出奔之日覩人情大
去不能扶危持顛憤憤于方寸者三年矣今我無異志
朝廷自啟禍機不可安然死於道路况太原險固之地
積粟甚多若且寬我我當奉之必若加兵我則外告鄰
方北構強敵興亡之數皎皎在天今欲發表稱疾以俟

其意諸公以爲何如掌書記桑維翰都押衙劉知遠贊
成密計帝遂拒末帝之命朝廷以帝不奉詔降旨削奪
官爵卽詔晉州刺史北面副招討使張敬達領兵圍帝
於晉陽帝尋命桑維翰詣諸道求援契丹遣人復書諾

之約以中秋赴義

玉堂閒話晉祖在并部嘗從容謂賓
佐云近因晝寢忽夢若頃年在洛京

時與天子連鑣于路過舊第天子請某入其第某遜讓
者數四不得已卽促轡而入至廳事下馬升自阼階西
向而坐天子已馳車去矣其夢如此羣僚莫敢有所答
是年冬果有鼎革之事蓋晉祖懷不軌之志久矣故託
夢以惑眾也遼史太宗紀云七月丙申唐河東節度
使石敬瑭爲其主所討遣趙瑩求救時趙德鈞亦遣使
至河東復遣桑維翰來告急遂許

與師八月庚午自將以援敬瑭

六月北面招討指揮

使安重榮以部曲數千人入城七月代州屯將安元信

率一軍與西北面先鋒指揮使安審信引五百騎俱至
八月懷州彰德軍使張萬迪各率千餘騎來降是月外
眾攻我甚急帝親當矢石人心雖固廩食漸困九月辛
丑契丹主率眾自雁門而南旌騎不絕五十餘里

遼史九月

丁酉入雁門戊戌次忻州己亥次太原

先使人報帝云吾欲今日便破賊

可乎帝使人馳告曰皇帝赴難比要成功賊勢至厚可
明旦穩審議戰未爲晚也使未達契丹已與南軍騎將
高行周符彥卿等合戰時張敬達楊光遠列陣西山下
士未及成伍而行周彥卿爲伏兵所斷捨軍而退敬達
等步兵大敗死者萬人是夜帝出北門與戎王相見戎

王執帝手曰恨會面之晚因論父子之義

遼史敬瑭率官屬來見帝

執手撫慰之契丹國志云敬瑭見契丹帝問曰皇帝遼來士馬疲倦遠與唐大戰而勝何也帝曰始我謂唐必斷雁門諸路伏兵險要不可得進使人偵視皆無之是以長驅而深入我氣力銳乘此擊之是以勝之敬瑭歎服

明日帝與契丹圍敬達營寨南軍不復出矣帝與契

丹本無結好自末帝見迫之後遣心腹何福以刀錯爲信一言親赴其難迅若流電信天意耶己酉唐末帝率親軍步騎三萬出次河橋辛亥末帝詔樞密使趙延壽分眾二萬爲北面招討使又詔魏博節度使范延光統本軍二萬人屯遼州十月幽州節度使趙德鈞領所部萬餘人自上黨吳兒谷合延壽兵屯團谷口與敬達寨

相去百里彌月竟不能相通

案遼史初圍晉安分遣精兵守其要害以絕援兵之

路趙延壽等皆逗留不進

十一月戎王會帝於營謂帝曰我三千里

赴義事須必成觀爾體貌恢廓識量深遠眞國主也天

命有屬事不可失欲徇蕃漢羣議冊爾爲天子帝飾讓

久之旣而諸軍勸請相繼乃命築壇於晉陽城南冊帝

爲大晉皇帝戎王自解衣冠授焉

案遼史太宗紀十一年冬十月甲子封敬

璿爲晉王十一月丁酉冊敬璿爲大晉皇帝

文曰維天

顯九年歲次丙申十一月丙戌朔十二日丁酉大契丹

皇帝若曰於戲元氣肇開樹之以君天命不恆人輔以

德故商德衰而周德盛秦德亂而漢國昌人事天心古

今靡異咨爾子晉王神鍾睿哲天贊英雄叶夢日以儲
祥應澄河而啟運迨事數帝歷試諸艱武畧文經迺由
天縱忠規孝節固自生知猥以渺躬奄有北土暨明宗
之享國也與我先哲王保奉明契所期子孫順承患難
相濟丹書未泯白日難欺願予纂承匪敢失墜爾惟近
戚實系本枝所以余視爾若子爾待予猶父也朕昨以
獨夫從珂本非公族竊據寶圖棄義忘恩逆天暴物誅
剪骨肉離間忠良聽任矯諛威虐黎獻華夷震悚內外
崩離知爾無辜爲彼致害敢徵眾旅來逼嚴城雖併吞
之志甚堅而幽顯之情何負達於聞聽深激憤驚乃命

興師爲爾除患親提萬旅遠殄羣凶但赴急難罔辭艱
險果見神祇助順卿士叶謀旗一麾而棄甲平山鼓三
作而殭屍徧野雖以遂予本志快彼羣心將期稅駕金
河班師玉塞矧中原無主四海未寧茫茫生民若墜塗
炭况萬幾不可以暫廢大寶不可以久虛拯溺救焚當
在此日爾有庇民之德格于上下爾有戡難之勲光于
區宇爾有無私之行通乎神明爾有不言之信彰乎兆
庶予懋乃德嘉乃丕績天之曆數在爾躬是用命爾當
踐皇極仍以爾自茲并土首建義旂宜以國號曰晉朕
永與爲父子之邦保山河之誓於戲補百王之闕禮行

茲盛典成千載之大義遂我初心爾其永保兆民勉持

一德愼乃有位允執厥中亦惟無疆之休其誠之哉禮

畢帝鼓吹導從而歸

案通鑑考異引廢帝實錄契丹立晉在閏月丁卯歐陽史及通鑑並

從薛史作十一月丁酉

始梁開國之歲卽前唐天祐四年也潞州

行營使李思安奏壺關縣庶穰鄉鄉人伐樹樹倒自分

兩片內有六字如左書云天十四載石進梁祖令藏於

祖庫然莫詳其義至帝卽位識者曰天字取四字中兩

畫加之於傍則丙字也四字去中之兩畫

案原本作中去之兩畫今

從冊府元龜改正

加十字則申字也帝卽位之年乃丙申也又

易云晉者進也國號大晉皆符契焉又帝卽位之前一

年歲在乙未鄴西有柵曰李固清淇合流在其側柵有橋橋下大鼠與蛇鬪鬪及日之申蛇不勝而死行人觀者數百識者志之後唐末帝果滅于申又末帝眞定常山人也有先人舊廬其側有古佛刹刹有石像忽搖動不已人皆異之及重圍晉陽帝遣心腹

案原本闕帝遣心腹四字今從

冊府元龜增入

何福輕騎求援北蕃蕃王自將諸部赴之不以

繪帛不以珠金若響應聲謂福曰吾已兆于夢皆上帝

命我非我意也

契丹國志引紀異錄云契丹主德光常晝寢夢一神人花冠美姿容輜輶甚盛

忽自天而下衣白衣佩金帶執鐸錄有異人十二隨其後內一黑兔入德光懷而失之神人語德光曰石郎使人喚汝汝須去覺告其母母忽之不以爲異後復夢卽前神人也衣冠儀貌儼然如故曰石郎已使人來喚汝

既覺而驚復以告母母曰可命筮乃召巫筮言太祖從西樓來言中國將立天王要爾爲助爾須去未浹旬唐石敬瑭反于河東爲後唐張敬達所敗亟遣趙瑩持表重賂許割燕雲求兵爲援契丹主曰我非爲石郎興師乃奉天帝敕使也時援兵未至僞將張敬達引軍逼城設柵柵

將成必有大風暴雨柵無以立後築長城城就又爲水潦所壞城終不能合晉陽有北宮宮城之上有祠曰毗沙門天王帝曾焚修默而禱之經數日城西北闔正受敵處軍候報稱夜來有一人長丈餘介金執斧行於城上久方不見帝心異之又牙城有僧坊曰崇福坊之廡下西北隅有泥神神之首忽一日有烟生其騰郁如曲突之狀坊僧奔赴以爲人火所延及俯而視之無所有

焉事尋達帝帝召僧之臘高者問焉僧曰貧道見莊宗將得天下曾有此烟觀此噴湧甚於當時兆可知矣自此日傍多有五色雲氣如蓮芰之狀帝召占者視之謂曰此驗應誰占者曰見處爲瑞更應何人又帝每詰旦使慰撫守陴者率以爲常忽一夕已暝城上有號令之聲聲不絕者三帝使人問之將吏云從上傳來者皆知神助時城中復有數家井泉暴溢不止及蕃軍大至合勢破之末帝之眾似拉朽焉斯天運使然非人力也是日帝言于戎王願以雁門已北及幽州之地爲戎王壽仍約歲輸帛三十萬戎王許之

永樂大典卷一萬五千六百四十三

舊五代史卷七十五終

三才圖會卷之三

雜考

三

舊五代史卷七十五攷證

晉高祖紀一本衛大夫碯漢丞相奮之後 案歐陽史
作其姓石氏不知其得姓之始

乃命築壇于晉陽城南 案通鑑作築壇于柳林遼史
亦作設壇晉陽

歲次丙申十一月丙戌朔十二日丁酉 案通鑑攷異
引廢帝實錄契丹立晉誤在閏月丁卯辨正在唐紀
歐陽史及通鑑並從晉紀作十一月丁酉

舊五代史卷七十五攷證

舊五代史卷七十六

宋司空同中書門下平章事薛居正等撰

高祖紀第二

晉書二

天福元年十一月己亥帝御北京崇元殿降制改長興七年爲天福元年大赦天下十一月九日昧爽已前應在京及諸州諸色罪犯及曾授僞命職掌官吏并見禁囚徒已結正未結正已發覺未發覺罪無輕重常赦不原者咸赦除之應明宗朝所行勅命法制仰所在遵行不得改易其在京鹽貨元是官場出糴自今後並不禁斷一任人戶取便糴易仍下太原府更不得開場糴貨

其麴每斤與減價錢三十文以節度判官趙瑩爲翰林學士承旨守尙書戶部侍郎知河東軍府事以節度掌書記桑維翰爲翰林學士守尙書禮部侍郎知樞密院事以觀察判官薛融爲吏部郎中兼侍御史知雜事太原縣令何羅周岳爲左諫議大夫節度推官竇貞固爲翰林學士軍城都巡檢使劉知遠爲侍衛馬軍都指揮使客將景延廣爲步軍都指揮使太原少尹李玘爲尙書工部侍郎閏十一月甲子晉安寨副招討使楊光遠等殺上將張敬達以諸軍來降丙寅制以翰林學士承旨知河東軍府戶部侍郎知制誥趙瑩爲門下侍郎同

中書門下平章事監修國史以翰林學士權知樞密事
禮部侍郎知制誥桑維翰爲中書侍郎同中書門下平
章事集賢殿大學士依前知樞密院事並賜推忠興運
致理功臣甲戌車駕至昭義受趙德鈞延壽降是日戎
王舉酒言於帝曰子遠來赴義大事已成皇帝須赴京
都今令大詳袞

舊作相溫
今改正

勒兵相送至河梁要過河者

任意多少予亦且在此州俟京洛平定便當北轅執手
相泣久不能別脫白貂裘以衣帝贈細馬二十四匹戰馬
一千二百匹仍誠曰子子孫孫各無相忘己卯至河陽
北節度使裴從簡來降舟楫已具庚辰望見洛陽烟火

相次有將校飛狀請進辛巳唐末帝聚其族與親將宋
審虔等登玄武樓縱火自焚而死至晚車駕入洛唐兵
解甲待罪皆慰而舍之帝止潛龍舊第百官稍稍見焉
詔御史府促朝官入見詔文武兩班臣寮應事僞庭者
並釋罪是日百辟謝恩於宮門之外甲申車駕入內御
文明殿受朝賀用唐禮樂制大赦天下應中外諸色職
掌官吏內曾有受僞命者一切不問僞廷賊臣張延朗
劉延皓劉延朗等並姦邪害物貪猥弄權罪旣滿盈理
難容貸除此三人已行勅命指揮外其有宰臣馬裔孫
樞密使房暉宣徽使李專美河中府節度使韓昭裔等

四人並令釋放少帝宜令中書門下追尊定諡擇日禮葬妃孔氏宜行追冊祔葬應天下節度使刺史下賓席郡職及將校等委中書門下各與改轉官資其北京管內鹽鑛戶合納逐年鹽利昨者僞命指揮每斗須令人戶折納白米一斗五升極知百姓艱苦自今後宜令人戶以元納食鹽石斗數目每斗依實價計定令錢數取人戶便穩折納斛斗其洛京管內逐年所配人戶食鹽起來年每斤特與減價錢十文應諸道商稅仰逐處將省司合收稅條例勝於本院前勝內該設名目者卽得收稅十二月己酉朔幸河陽餞送大詳袞蕃部兵士歸

國詔降末帝爲庶人丁亥制以司空馮道守本官兼門下侍郎平章事弘文館大學士以步軍都指揮使符彥饒爲滑州節度使以河陽節度使萇從簡爲許州節度使以澤州刺史劉凝爲華州節度使以皇子重乂爲河南尹庚寅以滑州節度判官石光贊爲宗正卿辛卯以舊相姚顗爲刑部尙書時自秋不雨經冬無雪命羣官徧加祈禱癸巳以邠州節度使張希崇爲靈武節度使鄧州節度使皇甫遇爲定州節度使詔國朝文物制度起居入閣宜依唐明宗朝事例施行鎮州衙內都虞候秘瓊作亂逐副使李彥琦殺都指揮使胡章同州小校

門鐸殺節度使楊漢賓燒劫州城丙申帝爲明宗皇后
曹氏薨舉哀于長春殿輟朝三日詔封故東丹王李贊
華爲燕王遣前單州刺史李肅部署歸葬本國以右拾
遺吳涓爲左補闕充樞密院學士己亥以汴州節度使
李周充西京留守以前河中節度使李從璋爲鄧州節
度使慈州奏草寇攻城三日而退庚子帝爲皇弟故彰
聖指揮使敬殷沂州指揮使敬德檢校太子賓客敬友
舉哀于長春殿以舊相盧文紀爲吏部尙書以皇城使
周瓌爲大將軍充三司使以左贊善大夫馬重績爲司
天監青州奏節度使房知溫卒詔鄆州王建立以所部

牙兵往青州安撫中書門下奏請以來年二月二十八日帝慶誕日爲天和節從之

天福二年春正月甲寅朔帝御文明殿受朝賀仗衛如

式乙卯日有蝕之

案五代春秋作正月乙卯朔日食據通鑑考異引十國紀年蜀人亦以乙

卯爲朔蓋晉人避正朝日食故改甲寅朔耳

是夜有赤白氣相間如耕墾竹

林之狀自亥至丑生北濁過中天明滅不定徧二十八

宿徹曙方散丁巳故皇弟敬德敬殷並贈太傅皇子重

裔重進重殷並贈太保右神武統軍康思立卒輟視朝

贈太子少師是日詔曰唐莊宗陵名與國諱同宜改爲

伊陵應京畿及諸州縣舊有唐朝諸帝陵并眞源等縣

並不爲次赤却以畿甸緊望爲定其逐處縣令不得以陵臺結銜考滿日依出選門官例指揮隔任後準格例施行其宋州亳州節度使刺史落太清宮使副名額庚申以前吏部郎中兼侍御史知雜事王松爲左諫議大夫水部郎中王易簡本官知制誥定州奏契丹改幽州爲南京中書奏請立宗廟從之以翰林學士工部侍郎和凝爲禮部侍郎依前充職詔內外交文武臣僚並與加恩皇基初造示普恩也太子少保致仕華溫琪卒贈太子太保是日詔應朝臣中有藉才特除外任者秩滿無遺闕將來擬官之時在外一任同在朝一任升進其就

便自求外職及不是特達選任者不在此限安州上言
節度使盧文進殺行軍副使率部下親兵過淮以前天
平軍節度使檢校太尉兼侍中王建立爲平盧軍節度
使以守司空門下侍郎平章事弘文館大學士馮道兼
諸道鹽鐵轉運等使天雄軍節度使兼中書令范延光
改封秦國公加食邑實封鳳翔節度使兼中書令西平
王李從暉加食邑實封乙丑以端明殿學士禮部侍郎
呂琦爲檢校工部尙書秘書監丙寅改中興殿爲天福
殿門名從之湖南節度使楚王馬希範加食邑實封改
賜功臣名號前昭義節度使檢校太傅同平章事高行

周起復右金吾衛大將軍依前昭義軍節度使泰寧軍
節度使李從溫荆南節度使南平王高從誨歸德軍節
度使趙在禮並加食邑實封改功臣名號以端明殿學
士戶部侍郎李崧爲兵部侍郎判戶部以左諫議大夫
王松判度支魏府范延光奏當管夏津鎮捕賊兵士誤
殺却新齊州防禦使祕瓊初延光將萌異志使人潛結
於瓊諾之及是以瓊背其謀密使精騎殺之由是延光
反狀明矣以工部侍郎李玘檢校右僕射爲汾州刺史
以前彰國軍節度使尹暉爲左千牛衛上將軍是日詔
曰西天中印土摩竭陀舍衛國大菩提寺三藏阿闍黎

沙門室利縛羅宜賜號弘梵大師庚午涇州節度使李德瑊徐州節度使安彥威秦州節度使康福延州節度使劉景巖襄州節度使安從進夏州節度使李彝殷並加食邑實封壬申正衙備禮冊贈故皇弟皇子等丙子故契丹人皇王歸葬輟視朝一日改汴州雍邱縣爲杞縣避廟諱也戊寅以兵部侍郎判戶部李崧爲中書侍郎同中書門下平章事充樞密使以權知樞密使事中書侍郎同中書門下平章事集賢殿學士桑維翰爲樞密使是日詔曰應天開國恭己臨人宜覃繼絕之恩以廣延洪之道宜於唐朝宗屬中取一人封公世襲兼隋

之鄴公爲二王後以後周介公備三恪主其祭祀及赴

大朝會

五代會要載原敕云其唐朝宗屬中舊在朝及諸道爲官者各據資歷考限滿日從品秩序遷

已有出身

任令參選以前鎮國軍節度使皇甫立爲神武統軍以

前宗正卿李郁爲太子賓客庚辰以吏部侍郎龍敏判

戶部二月丙戌以尙食使安友規充葬明宗皇后監護

使以河陽節度使安審暉爲鄆州節度使癸巳詔停北

京西北面計度司事吳越國王錢元瓘加食邑實封改

賜功臣名號己亥詔應諸道行軍副使等得替後且就

私家取便安止限一年後方得赴闕當便與比擬壬寅

詔應諸道馬步都虞候自今後朝廷更不差補委自藩

方於本州衙前大將中慎選久歷事任曉會刑獄者充以三年限仍不得於元隨職員內差補以左散騎常侍孔昭序爲太子賓客尙書左僕射劉昫左僕射盧質並加食邑實封甲辰以滄州留後馬全節爲橫海軍節度使以太子賓客韓曄爲貝州刺史左羽林統軍羅周敬爲右金吾衛上將軍丙午以皇子左驍衛上將軍重信爲檢校太保河陽三城節度使以權知河陽軍州事周瓌爲安州節度使詔中外臣寮或因差使出入並不得薦屬人於藩鎮希求事任如有犯者並準唐長興二年勅條處分戊申中書舍人陳乂改左散騎常侍應在朝

文武百寮及見任刺史先代未封贈者與贈母妻未敘封者並與敘封辛亥天和節帝御長春殿召左右街僧錄威儀殿內譚經循舊式也三月甲寅制北京留守太原尹皇子重貴封食邑三百戶刑部侍郎張鵬改兵部侍郎己未御史臺奏唐朝定令式南衙常參文武百寮每日朝退于廊下賜食謂之常食自唐末亂離常食漸廢仍於入閣起居日賜食每入閣禮畢閣門宣放仗羣官俱拜謂之謝食至僞主清泰年中入閣禮畢更差中使至正衙門日宣賜食百官並班重謝此則交失唐朝賜食之意於禮寔爲太繁臣恐因循漸失根本起今後

入閣賜食望不差中使口宣準唐明宗朝事例處分從

之

五代會要載其年四月御史臺奏文武百官每月朔望入閣禮畢賜廊下食在京時祇于廟堂幕次兩廊

下今在行朝于正衙門外權爲幕次房廊監狹伏恐五月一日朝會禮畢準例賜食于幕次難爲排比伏見唐明宗時兩省官于文明殿前廊下賜食今未審入閣日權于正衙門內兩廊下排比賜食爲復別有處分敕宜依明宗時舊

中書奏準勅故庶人三月七日以王禮葬

其妻男等並以禮葬請輟其日朝參一日從之以宣徽

南院使楊彥詢爲左監門衛上將軍依前充宣徽使充

州李從溫奏節度副使王謙構軍士作亂尋已處置丙

寅詔王者省方設教靡憚於勤勞養士撫民必從其宜

便願惟涼德肇啟不圖常務去于煩苛冀漸臻于富庶

念京城俶擾之後屬舟船焚燹之餘饋運頓虧支費殊
闕將別謀於飛輓慮轉困於生靈以此疚心未嘗安席
今以夷門重地梁苑雄藩水陸交通舟車必集爰資經

度須議按巡寧免暫勞所期克濟取今月二十六日巡

幸汴州云

通鑑范延光聚卒繕兵悉召巡內刺史集魏州將作亂會帝謀徙都大梁桑維翰曰大梁

北控燕趙南通江淮水陸都會資用富饒今延光反形已露大梁距魏不過十驛彼若有變大軍尋至所謂疾雷不及掩耳也丙寅下詔託以前貝州刺史史圭爲刑

以洛陽漕運有關東巡汴州以前貝州刺史史圭爲刑部侍郎充諸道鹽鐵轉運副使澤州刺史閻至爲戶部

侍郎詔車駕經過州府管界所有名山大川帝王陵廟
名臣祠墓去路十里者令本州排比祇候駕經過日以

酒脯祭告左僕射劉昫等議立宗廟以立高祖已下四親廟其始祖一廟伏候聖裁御史中丞張昭遠議請依隋唐之制立四廟推四世之中名位高者爲太祖詔下百官定議百官請依唐制追尊四廟爲定從之甲戌以右龍武統軍楊思權爲左衛上將軍乙亥前鄜州節度使張萬進加檢校太傅前定州節度使李從敏加檢校太尉以吏部郎中兼侍御史知雜事薛融爲左諫議大夫以兵部郎中段希堯爲右諫議大夫戊寅以戶部尙書王權爲兵部尙書工部尙書崔居儉爲戶部尙書兵部尙書李鱗爲太子少保兵部尙書致仕裴皞爲工部

尙書東上閣門使李守貞爲右龍武將軍充職庚辰車
駕離京四月癸未朔至鄭州防禦使白景友進牲餼器
皿帝曰不出民力否景友曰臣畏陛下法皆辦於已俸
命收之甲申駕入汴州丁亥制應天福二年四月五日
昧爽已前諸道州府見禁囚徒大辟已下罪無輕重並
釋放天福元年已前諸道州府應係前殘欠租稅並特
除免諸道係徵諸色人負省司錢物宜令自偽清泰元
年年終已前所欠者據所通納到物業外並與除放昨
者行至鄭州滎陽縣界路旁見有蟲食及旱損桑麥處
委所司差人檢覆量與蠲免租稅河陽管內酒戶百姓

應欠天福元年閏十一月者二十五日已前不敷年額
麴錢並放其諸處經兵火者亦與指揮當罪卽誅式明
常典旣往可憫宜示深仁僞清泰中臣寮內有從誅戮
者並許收葬天下百姓有年八十已上者與免一子差
徭仍逐處簡署上佐官梁故滑州節度使王彥章效命
當時致身所事稟千年之生氣流百代之令名宜令超
贈太師子孫量才敘錄應諸道州府管界有自僞命抽
點鄉兵之時多是結集劫盜因此畏懼刑章藏隱山谷
宜令逐處曉諭招攜各令復業自今年四月五日已前
爲非者一切不問如兩月不歸業者復罪如初丁酉宣

武軍節度使侍衛親軍使楊光遠加兼侍中己亥陝西
節度使侍衛都虞候劉知遠加檢校太保庚子北京鄴
都徐兗二州並奏旱詔今後立妃及拜免三公宰相及
命將封親王公主宜令並降制命餘從令式處分夏五
月壬子朔帝御崇光殿受朝賀仗衛如式詔洛京魏府
管內內所徵今年夏苗麥稅等宜放五分之一以徵旱
故也丙辰御史中丞張昭遠奏汴州在梁室朱氏稱制
之年有京都之號及唐莊宗平定河南復廢爲宣武軍
至明宗行幸之時掌事者因緣修葺衙城遂挂梁室時
宮殿門牌額當時識者竊或非之一昨車駕省方暫居

梁苑臣觀衙城內齋閣牌額一如明宗行幸之時無都號而有殿名恐非典據臣竊尋秦漢已來寰海之內鑾輿所至多立宮名近代隋室於揚州立江都宮太原立汾陽宮岐州立仁壽宮唐朝於太原立晉陽宮同州立長春宮岐州立九成宮宮中殿閣皆題署牌以類皇居請準故事於汴州衙城門權挂一宮門牌額則餘齋閣並可取便爲名勅行闕宜以大寧宮爲名湖南青草廟舊封安流侯進封廣利公洞庭廟進封靈濟公磊石廟舊封昭靈侯進封威顯公黃陵二妃廟舊封懿節廟改封昭烈廟從馬希範之請也戊午以前成德軍節度判

官張彭爲太府卿壬戌詔在朝文武臣寮每人各進封事一件仍須實封通進務裨闕政用副虛懷甲子以虞部郎中知制誥于嶠爲中書舍人以戶部郎中于邁爲虞部郎中知制誥故太子少保致仕朱漢賓贈司空乙丑六宅使王繼弘送義州衙前收管前洺州團練使高信送復州收管二人於崇禮門喧爭爲臺司所劾故也戊辰翰林學士戶部員外郎知制誥竇貞固改工部郎中知制誥翰林學士都官郎中知制誥李愼儀改中書舍人仍賜金紫並依舊充職庚午制封皇第二十一女爲長安公主封皇第十一妹烏氏爲壽安長公主皇第

十二妹史氏爲永壽長公主皇第十三妹杜氏爲樂平
長公主王申天雄軍節度使守太傅兼中書令興唐尹
范延光進封臨清王加食邑三千戶鳳翔節度使檢校
太師兼中書令西平王李從暉進封岐王丙子平盧軍
節度使兼中書令王建立進封臨淄王昭信軍節度使
侍衛馬軍都指揮使景延廣改寧江軍節度使典軍如
故太常卿梁文矩奏定四廟諡號廟號陵號太常少卿
裴坦奏定四廟皇后追尊諡號從之戊寅以中書舍人
權知貢舉王延爲御史中丞以翰林學士戶部侍郎知
制誥崔悅爲兵部侍郎充承旨以翰林學士承旨兵部

侍郎程遜爲檢校禮部尙書太常卿檢校吏部尙書太
常卿梁文矩爲吏部尙書以御史中丞張昭遠爲戶部
侍郎以吏部尙書盧文紀爲太子少傅己卯詔太社內
先收掌唐朝罪人首級等宜令骨肉或先舊寮屬收葬
其喪葬儀注不得過制

案改葬梁末帝因婁繼英之請也事未及行而繼英誅死至九

月甲寅始命安崇阮改葬詳見通鑑

六月壬午朔制宗正卿石光贊奏榮

陽道左有萬石君石奮之廟德行懿美宜示封崇用光

遠祖之徽猷益茂我朝之盛典贈奮太傅癸未契丹使

伊勒希巴

舊作夷離畢今改正

來聘致馬二百匹及人參貂鼠皮

走馬木碗等物乙酉翰林學士司封員外郎知制誥王

仁裕改都官郎中右贊善大夫盧損改右散騎常侍前有朝貶故也以秘書少監致仕劉頎爲鴻臚卿致仕前光祿少卿尹玉羽以少府監致仕丙戌宰臣李崧上表讓樞密使於趙瑩以瑩佐命之元臣也詔不允以前義成軍節度使李彥舜爲左武衛大將軍以左散騎常侍唐訥爲檢校禮部尙書國子祭酒以前左龍武統軍李承約爲左驍衛上將軍戊子宰臣趙瑩自契丹使回癸巳東都奏瀍澗河溢壞金沙灘內舍屋幽州趙思溫奏瀛莫兩州元係當道其刺史常行周白彥球乞發遣至臣本府詔遣行周等赴闕甲午六宅使張彥自魏府迴

奏范延光叛命滑州符彥饒飛奏有兵士自北來傳范延光到黎陽乞發兵屯禦宜遣客省使李守貞往延光所問罪尋命護聖都指揮使白奉進領騎士一千五百赴白馬渡巡檢乙未魏府范延光男閑廐使守圖送御史臺攝荆南節度行軍司馬檢校太保歸州刺史王保義加檢校太傅知武泰軍節度觀察留後充荆南行軍司馬兼沿淮巡檢使襄州奏江水漲一丈二尺丁酉遣內班史進能押信箭一對往滑州賜符彥饒以前磁州刺史劉審交爲魏府計度使以東都巡檢使張從賓充魏府西南面都部署遣侍衛使楊光遠領步騎一萬赴

滑州以東都副留守張延播充洛京都巡檢使白奉進奏捉得賊卒張柔稱范延光差澶州刺史馮暉充一行都部署元從押衙孫銳充一行兵馬都監帝覽奏謂侍臣曰朕雖寡德寡謀自謂不居延光之下而馮暉孫銳過於兒戲朝夕就擒安能抗拒大軍爲我之患乎天平軍節度使安審琦起復舊任翰林學士禮部侍郎和凝改端明殿學士己巳范延光差牙將王知新齎表到闕不令朝見收付武德司丁未詔侍衛使楊光遠充魏府西面部署以張從賓充副兼諸軍都虞候昭義軍節度使高行周充魏府西南都部署是日張從賓亦叛與范

延光叶謀害皇子河陽節度使重信皇子東都留守重

父己酉以奉國都指揮使侯益護聖都指揮使杜重威

領步騎五千往屯汜水關備從賓之亂也

通鑑七月張從賓攻汜水

關殺巡檢使宋廷浩帝戎服嚴輕騎將奔晉以避之桑維翰叩頭苦諫曰賊鋒雖盛勢不能久請少待之不可輕動帝乃止七月辛亥兩浙錢元瑾奏弟吳越士客馬步諸

軍都指揮使靜海軍節度使元球非時入府欲謀爲亂

腰下搜得匕首已誅戮訖詔削元球在身官爵甲寅奉

國都指揮使馬萬奏滑州節度使符彥饒作亂屠害侍

衛馬軍都指揮使白奉進尋以所部兵擒到彥饒差立

功都虞候方太押送赴闕尋賜死於路是日削奪范延

光在身官爵以馬萬爲滑州節度使以昭義節度使高
行周爲河南尹東都留守充西面行營諸軍都部署以
護聖左右廂都指揮使杜重威爲昭義軍節度使兼侍
衛馬軍都指揮使

案原本脫馬軍都三字今從通鑑增入

充西面行營副

部署以奉國都指揮使侯益爲河陽節度使以右神武
統軍王周充魏府行營步軍都指揮使以滑州節度使
馬萬充魏府行營馬軍都指揮使以左僕射劉昫充東
都留守兼判河南府事杜重威等奏收下汜水關破賊
千人張從賓及其殘黨奔投入河兼收到護聖指揮使
曹再晟一百人騎稱背賊投來並送赴行闕升貝州爲

防禦使額皇子故東都留守重父贈太傅皇子故河陽
節度使重信贈太尉勅朋助張從賓逆人張延播張繼
祚等十人宜令收捕親的骨肉並處斬丁卯以唐開府
儀同三司守太尉兼中書令西平王李晟五代孫臧爲
耀州司戶參軍示勸忠之義也壬申帝御崇元殿備禮
冊四廟親授寶冊於使攝太尉守司空門下侍郎平章
事馮道使副攝司徒守工部尙書裴皞赴洛京行禮甲
戌以宰臣趙瑩判戶部以吏部侍郎判戶部龍敏爲東
都副留守詔洛京留司百官並赴闕安州軍亂指揮使
王暉害節度使周瓌於理所遣右衛上將軍李金全領

千騎赴安州八月辛巳以許州節度使葛從簡爲徐州
節度使以陝州節度使侍衛馬步軍都虞候劉知遠爲
許州節度使以權北京留守徐州節度使安彥威爲太
原尹北京留守河東節度使宰臣監修國史趙瑩奏請
循近例依唐明宗朝凡有內廷公事及言動之間委端
明殿學士或樞密院學士侍立冕旒繫日編錄逐季送
當館其百司公事亦望逐季送當館旋要編修日曆從
之丁亥以前宋州節度使李從敏爲陝州節度使戊子
以尙書左丞鄭韜光爲戶部尙書致仕改元德殿爲廣
政殿門名從之庚子華州渭河泛溢害稼宰臣馮道加

開府儀同三司食邑實封左僕射劉昫加特進兼鹽鐵轉運等使故東京留守判官李遐追贈右諫議大夫其母田氏封京兆郡太君子孫量才敘錄仍加賻贈長給遐在身祿俸終母之世先是遐監左藏庫於洛陽會張從賓叛令強取錢帛遐拒而不與因而遇害故有是命乙巳詔天下見禁囚徒除十惡五逆放火劫舍持杖殺人合造毒藥官典犯贓欠負官錢外其餘不問輕重已發覺未發覺已結正未結正並從釋放應自張從賓作亂以來有曾被張從賓及張延播脅從染污者及符彥饒下隨身軍將等兼安州王暉徒黨除已誅戮外並從

釋放一切不問張繼祚在喪紀之中承逆豎之意顯從
叛亂難貸刑章乃睭先臣實有遺德遽茲乏祀深所軫
懷其一房家業準法雖已籍沒所有先臣并祖父母墳
莊祠堂並可交付骨肉主張應自梁朝後唐以來前後
奉使及北京沿邊管界擄掠往向北人口宜令官給錢
物差使齎持往彼收贖放歸本家云繼祚故齊王全義
之子也故有是詔丙午詔天下刑獄繫囚染疾者宜差
醫工治療官中量給藥價事輕者仍許家人看候合杖
者俟損日決遣九月庚戌朔以前太府卿兼通事舍人
陳瓚爲衛尉卿兼通事舍人壬子故安遠軍節度使周

環贈太傅甲寅皇子北京留守知河東軍府事太原尹
重貴加檢校太保爲右金吾衛上將軍以右龍武統軍
安崇阮爲右衛上將軍以前保大軍節度使檢校太尉
張萬進爲右龍衛軍統軍以右領軍衛上將軍權知安
州軍州事李金全爲安遠軍節度使魏府招討使楊光
遠進攻城圖戊午以太子賓客孔昭序爲工部尙書致
仕將作少監高鴻漸上言伏覩近年以來士庶之家死
喪之苦當殯葬之日被諸色音聲伎藝人等作樂攪擾
求覓錢物請行止絕從之庚申靜江軍節度使檢校太
尉同平章事馬希杲加階爵及功臣名號以前兵部侍

郎楊凝式爲檢校兵部尙書太子賓客故右金吾衛上將軍羅周敬贈太傅乙丑鄧州節度使李從璋卒贈太師改興唐府爲廣晉府興唐縣爲廣晉縣癸酉以左諫議大夫判度支王松爲尙書工部侍郎甲戌貝衛兩州奏河溢害稼乙亥以將作監王岍爲太子賓客十月壬午以宣徽南院使左監門衛上將軍楊彥詢爲鄧州威勝軍節度使詔選人試判兩道以左司郎中張瑑爲右諫議大夫以刑部侍郎鹽鐵轉運副使史圭爲吏部侍郎以曹州刺史宋光業爲宣徽北院使以左金吾衛大將軍高漢筠爲左驍衛大將軍充內客省使以宣徽北

院使左驍衛大將軍劉處讓爲左監門衛上將軍充宣
徽南院使丙戌遣使祀五嶽四瀆故天平軍節度使閻
寶追封太原郡王故大同軍節度使李存璋贈太師故
瀛州刺史李嗣顏贈太尉故相州刺史史建瑭故代州
刺史王建及並贈太保故幽州節度使周德威追封燕
王十一月庚戌賜光遠空名官告自司空至常侍凡四
十道將士立功者得補之而後奏中書上言準唐貞元
二年九月五日勅文官充翰林學士及皇太子諸王侍
讀武官充禁軍職事並不常朝參其在三館等諸職事
者並朝參訖各歸所務自累朝以來文武在內廷充職

兼判三司或帶職額及六軍判官等例不赴常朝元無正勅準近勅文武職事官未升朝者按舊制並赴朔望朝參其翰林學士侍讀三館職事望準元勅處分其諸在內廷諸司使等每受正官之時來赴正衙謝後不赴常朝大朝會不離禁廷位次三司職官免常朝唯赴大朝會其京司未升朝官員祇赴朔望朝參帶諸司職掌者不在此例文官除端明殿翰林學士樞密院學士中書省知制誥外有兼官兼職者仍各發遣本司公事從之丙申太子賓客王环卒改潞京潛龍宅爲廣德宮北京潛龍宅爲興義宮戊午中書奏準雜令車駕巡幸所

祇承者賜贈並同京官從戊辰鎮海鎮東節度使吳越王錢元瓘加天下兵馬副元帥封吳越國王庚午以右拾遺李澣充翰林學士甲戌令太常卿程遜兵部員外郎韋棣充吳越國王加恩使甲子以戶部侍郎張昭遠守本官充翰林學士仍知制誥乙丑湖南馬希範貢寶裝龍鳳用結銀花果子等物帝覽之謂侍臣曰奇巧蕩心斯何用耳但以來遠之道不欲阻其意聞者服之壬午安州李金全上言奉詔抽臣元隨左都押衙胡漢筠其人染重病候損日赴闕漢筠本滑吏也從金全歷數鎮而濫聲喧聞帝知之欲授以他職免陷功臣漢筠懼

其罪遂託疾由是勸金全貳於朝廷自此始也十二月
以監察御史徐台符爲尙書膳部員外郎知制誥以右
補闕史官修撰吳承範爲尙書屯田員外郎知制誥左
諫議大夫薛融改中書舍人辭而不拜尙書水部郎中
知制誥王易簡改中書舍人故隴西郡王李嗣昭追封
韓王故橫海軍節度使安審通贈太師辛丑湖南節度
使兼中書令楚王馬希範加食邑實封改賜扶天佐運
同德致理功臣甲辰車駕幸相國寺祈雪

永樂大典卷
一萬五千六

百四
十三

舊五代史卷七十六終

舊五代史卷七十六攷證

晉高祖紀二甲戌車駕至昭義 案歐陽史及通鑑並

從是書作甲戌至潞州遼史作辛未與是書異

己卯至河陽北 案是書唐紀作庚辰晉帝至河陽遼

史又作辛巳並與此紀異通鑑作己卯與此紀同

乙卯日有食之 案五代春秋作正月乙卯朔日食通

鑑攷異引十國紀年蜀人亦以乙卯爲朔蓋晉人避

正朝日食故改甲寅朔耳

定州奏契丹改幽州爲南京 南京歐陽史作燕京通

鑑遼史契丹國志並作南京

安州上言節度使盧文進殺行軍副使率部下親兵過淮案盧文進棄鎮奔吳通鑑作元年十二月五代春秋歐陽史作二年正月與是書同

洞庭廟進封靈濟公案洞庭廟不載舊封疑有脫文攷五代會要十國春秋並與是書同

磊石廟舊封昭靈侯進封威顯公威顯公五代會要作廣利威顯公

以奉國都指揮使侯益爲河陽節度使案宋史侯益傳晉祖召益謂曰宗社危若綴旒卿能爲朕死耶益曰願假銳卒五千人破賊必矣以益爲西面行營副

都部署據是書高行周爲都部署杜重威爲副部署
不言侯益爲副都部署與宋史異

杜重威等奏收下汜水關破賊千人張從賓及其殘黨
奔投入河 案宋史侯益傳益率禁兵數千人次虎
牢從賓軍萬餘人夾汜水而陣益親鼓士乘之大敗
其眾擊殺殆盡汜水爲之不流從賓乘馬入河溺死
據是書祇言破賊千人與宋史異

安州軍亂指揮使王暉害節度使周瓌于理所 案王
暉害周瓌五代春秋通鑑俱不書日歐陽史作丙子
是書作甲戌諸史所載俱異

大詳衮舊作大相溫今改 伊勒希巴舊作夷離畢今

改

舊五代史卷七十六攷證

舊五代史卷七十七

宋司空同中書門下平章事薛居正等撰

高祖紀第三

晉書三

天福三年正月戊申朔帝御崇元殿受朝賀仗衛如式
已酉百官守司以太史先奏日蝕故也至是不虧內外
稱賀壬戌是夜以上元張燈於京城縱都人遊樂帝御
太寧宮門樓觀之丙申端明殿學士禮部侍郎和凝兼
判度支工部侍郎判度支王松政尙書刑部侍郎戶部
郎中高延賞改左諫議大夫充諸道鹽鐵轉運副使王
申以前右諫議大夫薛融爲左諫議大夫前興元節度

使張筠卒於西京輟視朝一日

五代會要太常禮院申準故事前節度使無例

輟朝敕宜特

輟一日朝參二月庚辰左散騎常侍張允進駁赦論帝

覽而嘉之降詔獎飾仍付史館甲申荆南節度使高從誨加食邑實封戊子翰林學士李瀚賜緋魚袋以尙書屯田員外郎知制誥吳承範爲庫部員外郎充樞密院直學士乙未御札曰曾有宣示百官令進封事今據到者未及十人朕雖無德自行敕後已是數月至於假手於人也合各有一件事敷奏食祿於朝豈當如是言而不用朕所甘心用而不言誰之責也丙申制武清軍節度使馬希萼改威武軍節度使辛丑中書上言禮經云

禮不諱嫌名二名不偏諱注云嫌名謂音聲相近若禹
與宇邱與區也二名不偏諱謂孔子之母名徵在言在
不稱徵言徵不稱在此古禮也唐太宗二名並諱玄宗
二名亦同人姓與國諱音聲相近是嫌名者亦改姓氏
與古禮有異廟諱平聲字卽不諱餘三聲諱側聲卽不
諱平聲字所諱字正文及偏旁闕點望依令式施行詔
曰朝廷之制今古相沿道在人弘禮非天降方開曆數
虔奉祖宗雖踰孔子之文未爽周公之訓所爲二名及
嫌名事宜依唐禮施行

案太原縣有史匡翰碑立於天
福八年匡翰建瑋之子也碑於

瑋字空文以避諱而建瑋父敬思
仍書敬字蓋當時避諱之體如此

乙巳天和節宴近臣

於廣政殿三月戊午鴻臚卿劉頎卒贈太子賓客壬戌
東上閣門使前司農卿蘇繼顏改鴻臚卿充職迴鶻可
汗王仁美進野馬獨峯馳玉團礪砂等方物甲戌永壽
長公主薨輟朝一日故涇州節度觀察留後盧順密贈
右驍衛上將軍丁丑詔禁止私下打造鑄瀉銅器四月
丁亥以尙書吏部侍郎盧詹爲尙書左丞中書舍人李
祥上疏請沙汰在朝文武臣寮以減冗食仍條貫藩侯
郡守凡遇溥恩不得多奏衙前職員妄邀恩澤疏奏嘉
之戊子宣武軍節度使侍衛親軍都指揮使廣晉府行
營都招討使楊光遠加兼中書令昭義節度使侍衛馬

軍都指揮使廣晉府行營排陣使杜重威河陽節度使
兼奉國左右廂都指揮使廣晉府行營馬步都虞候侯益
並加檢校太傅鳳翔節度使檢校太師兼中書令岐王
李從曠進奉封秦王平盧軍節度使檢校太尉兼中書
令臨淄王王建立進封東平王甲午泰寧軍節度使李
從溫西京留守京兆尹李周歸德軍節度使趙在禮並
加兼侍中是月諸道藩侯郡守皆等第加恩改雍熙樓
爲章和樓避廟諱也五月丁未朔帝御崇元殿受朝仗
衛如式丁巳詔應諸州縣名犯廟諱者並改之庚申以
楊光遠男承祚爲檢校工部尙書左衛將軍駙馬都尉

丁卯魏府行營步軍都指揮使檢校司徒右神武統軍
王周加檢校太保戊辰故振武節度使李嗣本贈太尉
已巳詔中外臣寮帶平章事侍中中書令及諸道節度
使並許私門立戟仍並官給及據官品依令式處分六
月丁丑右監門衛上將軍王彥璘卒甲申以太子詹事
王居敏置制安邑縣解縣兩池榷鹽事左諫議大夫薛
融上疏請罷修洛京大內優詔褒之尋罷營造庚寅翰
林學士尚書工部郎中知制誥竇貞固改中書舍人充
職戶部尚書致仕蕭遠卒贈右僕射詔貢舉宜權停一
年以員闕少而選人多常調有淹滯故也丁酉詔尚書

省司門應管諸闕令丞等宜準唐天成四年四月四日
勅本司不得差補祇委闕鎮使鈐轄見差補者並晝時
勒停訖奏聞應常帶使相節度使自楊光遠已下凡七
人並改鄉里名號七月丙午朔差左諫議大夫薛融秘
書監呂琦駕部員外郎兼侍御史知雜事劉暉刑部郎
中司徒詡大理正張仁瑑同共詳定唐明宗朝編勅庚
戌御史王延改尙書右丞尙書右丞虞導改尙書吏部
侍郎以左諫議大夫薛融爲御史中丞辛酉製皇帝受
命寶以受天明命惟德允昌爲文據六典受命寶者天
子修封禪禮神祇則用之其始皆破皇業錢以製之皇

業者藩邸主事之所有也

五代會要天福三年六月中書門下奏準敕製皇帝受命

寶今案唐貞觀十六年太宗文皇帝所刻之璽白玉爲螭首其文曰皇帝景命有德者昌敕宜以受天明命惟

德允昌爲

文刻之王戊虞部郎中知制誥于邁改中書舍人宰

臣趙瑩桑維翰李崧各改鄉里名號荆南節度使高從

誨本貫汴州浚義縣王畿鄉表節東坊改爲擁旌鄉浴

鳳里八月戊寅以左僕射劉昫爲契丹冊禮使左散騎

常侍韋勲副之給事中盧重爲契丹皇太后冊禮使

案歐

陽史八月戊寅馮道及左僕射劉昫爲契丹冊禮使通鑑戊寅以馮道爲太后冊禮使左僕射劉煦爲契丹主冊禮使据薛史則爲太后冊王午魏府軍前奏前澶州

刺史馮暉自逆城來歸定州奏境內旱民多流散詔曰

朕自臨寰宇每念生民務切撫綏期于富庶屬干戈之
未戢慮徭役之或煩惟彼中山偶經夏旱因茲疾苦遽
至流移達我聽聞深懷憫惻應定州所差軍前夫役逃
戶夏秋稅並放甲申襄州奏漢江水漲一丈一尺已丑
以前澶州刺史馮暉爲檢校太保充義成軍節度使詔
河中府同州絳州等三處災旱逃移人戶下所欠累年
殘稅并今年夏稅差科及麥苗子沿徵諸色錢物等並
放其逃戶下秋苗據見檢到數不計足元額及出剩頃
畝並放一半委觀察使散行曉諭專切攜應歸業戶人
仍指揮逐縣切加安撫翰林學士中書舍人竇貞固上

言請令文武百寮逐司之內各奏舉一人述其人有某

能堪爲某官某職據所薦否臧定舉主黜陟

宋史竇貞固傳載此

疏略云爲國之要進賢是先陛下方樹丕基宜求多士乞降詔百僚令各司議定一人有何能識堪何職官朝廷依奏用之若能符薦引果謂當才所奏之官望加獎賞如乖其舉或涉徇私所奏之官宜加黜罰自然官由德序位以才升三人同行尙聞擇善十日

疏奏嘉之仍

所視必不濫知臣職在論思敢陳狂狷

令文武百官於縉紳之內草澤之中知灼然有才器者

列名以奏宴契丹冊禮使於廣政殿戊戌鄆州奏陽穀

縣界河決青州王建立奏高麗國宿衛質子王仁翟乞

放歸鄉里從之辛丑鎮邢定三州奏奉詔共差樂官六

十七人往契丹詔魏府城下自屯軍已來墳墓多經斷

掘雖已差人收掩今更遣太僕卿邢德昭往伸祭奠九

月己酉宮苑使焦繼勳自軍前押范延光牙將馬諤齋

歸命請罪表到闕王子延光領部下將士素服於本府

門俟命有詔釋罪乙卯詔司空兼門下侍郎平章事馮

道官一品給門戟十六枝中書侍郎平章事桑維翰李

崧給門戟十二枝己未宣遣靜鞭官劉守威左金吾仗

勘契官王英

案歐史作王殷

司天臺雞叫學生商暉等

朱遜殷作商

並赴契丹庚申契丹使人往洛京般取趙氏公主

宋史趙贊

傳德鈞父子降晉契丹盡錮之北去贊獨與母公主留西洛天福三年晉祖命贊奉母歸薊門襄州奏

漢江水漲三丈出岸害稼東都奏洛陽水漲一丈五尺

壤下浮橋乙丑于闐國王楊仁美遣使貢方物迴鶻可

汗遣使貢驪馬丙寅趙延壽進馬謝恩放燕國長公主

歸幽州

案通鑑不載趙延壽進馬之事胡三省云延壽妻唐明宗女也延壽在北用事故來取之

延光差節度副使李式到闕奉表首罪兼進玉帶一條

遣宣徽南院使劉處讓權知魏府軍事己巳復范延光

官爵其制畧曰頃朕始登大寶未靜中原六飛纔及於

京師千里未通於懷抱楚王求舊方在遺簪曾子傳疑

忽成投杼尋聞悛悔遽戮奸回干戈俄至於經時雷雨

因思於作解果馳賔介疊奉表章向丹闕以傾心瀝衷

情而効順而况保全黎庶完整甲兵納款斯來其功非

細得不特頒鐵契重建牙章封本郡之土茅移樂郊之
旌鉞至於將吏咸降絲綸於戲上元之運四時不愆者
信大道之崇三寶所重者慈活萬戶之傷夷息六師之
勞瘁遂予仁憫旌爾變通永貽子孫長守富貴敬佩光
寵可不美歟可復推誠奉義佐運致理功臣天雄軍節
度管內觀察處置等使開府儀同三司太傅兼中書令
廣晉尹上柱國臨清王食邑一萬戶食實封一千戶改
授鄆州刺史天平軍節度鄆齊案原本有闕文等觀察處置等
使賜鐵券改封高平郡王仍令擇日備禮冊命以天雄
軍節度副使檢校刑部尚書李式檢校尚書右僕射充

亳州團練使以貝州刺史孫漢威檢校太保隴州防禦使以天雄軍三城都巡檢使薛霸爲檢校司空衛州刺史以天雄軍馬步軍都指揮使王建爲檢校司空虢州刺史以天雄軍內外馬軍都指揮使藥元福爲檢校司空深州刺史以天雄軍內外步軍都指揮使安元霸爲檢校司空隨州刺史以天雄軍都監前河陽行軍司馬李彥珣爲檢校司空坊州刺史李式延光之舊寮也其餘皆延光之將佐也故有是命庚午遣省使李守貞押器幣賜魏府立功將校辛未以魏府招討使楊光遠檢校太師兼中書令行廣晉尹充天雄軍節度使十月乙

亥福建節度使王繼恭遣使貢方物戊寅契丹命使以

寶冊上帝徽號曰英武明義皇帝

歐陽史作契丹使中書令韓頰來奉冊

是日左右金吾六軍儀仗太常鼓吹等竝出城迎引至
崇光殿前陳列如儀鄆州范延光奏到任內丙辰御札
曰爲國之規在於敏政建都之法務要利民歷攷前經
朗然通論顧惟涼德獲啟丕基當數朝戰伐之餘是兆
庶傷殘之後車徒旣廣帑廩咸虛經年之輓粟飛芻繼
日而勞民動眾常煩漕運不給供需今汴州水陸要衝
山河形勝乃萬庾千箱之地是四通八達之郊爰自按
巡益觀宜便俾升都邑以利兵民汴州宜升爲東京置

開封府仍升開封浚儀兩縣爲赤縣其餘升爲畿縣應
舊置開封府時所管屬縣並可仍舊割屬收管亦升爲
畿縣其洛京改爲西京其雍京改爲晉昌軍留守改爲
節度觀察使依舊爲京兆府列在七府之上其曹州改
爲防禦州其餘制置並委中書門下商量施行丙戌以
護聖右廂都指揮使曹州刺史張彥澤爲鎮國軍節度
使以工部尙書裴皞爲尙書左僕射致仕是日詔改大
寧宮門爲明德門又改京城諸門名額南門尉氏以薰
風爲名西二門鄭門梁門以金義乾明爲名北二門酸
棗門封邱門以玄化宣陽爲名東二門曹門宋門以迎

春仁和爲名戊子以右金吾大將軍馬從斌爲契丹國

信使考功郎中劉知新副之

案馬從斌使契丹以報其加尊號也考通鑑則始以命王

權權辭以老疾乃改爲命從斌耳歐陽史止書從以前斌不載劉知新五代春秋作十月馮道使於契丹

天平軍節度使檢校太尉同平章事安審琦爲晉昌軍

節度使行京兆尹襄州奏江水漲害稼壬辰以樞密使

中書侍郎平章事集賢殿大學士桑維翰兼兵部尙書

皆罷樞密使

案以上疑有闕文据通鑑考異引晉高祖實錄維翰與李崧並罷樞密使戊戌

大赦天下以魏府初平故也庚子楊光遠朝覲到闕對

于便殿賜賚甚厚于闐國王李聖天冊封大寶于闐國

王以杭州嘉興縣爲秀州從錢元瓘之奏也十一月甲

辰樞密直學士祠部員外郎吳涓進金部郎中知制誥
樞密直學士庫部員外郎吳承範進祠部郎中知制誥
乙巳鄆州范延光來朝丙午封閩王昶爲閩國王加食
邑一萬五千戶又以中武建武等軍節度使檢校太師
兼中書令蘓州刺史錢元璩爲太傅以清海軍節
度使廣州刺史錢元璩爲檢校太尉兼中書令仍改名
元懿應付魏府行營將校及六軍諸道本城將校等並
與加恩戊申以門下侍郎平章事監修國史判戶部趙
瑩兼吏部尙書以威武軍節度福建管内觀察處置等使
王繼恭爲特進檢校太傅仍封臨海郡王以魏博節度

使楊光遠爲守太尉洛京留守兼河陽節度使判六軍
諸衛事端明殿學士尙書吏部侍郎判度支和凝改尙
書戶部侍郎充職庚戌鄆州范延光上表乞休退詔不
允辛亥升廣晉府爲鄴都置留守升廣晉元城兩縣爲
赤縣屬府諸縣升爲畿縣升相州爲彰德軍置節度觀
察使以澶衛二州爲屬郡其澶州仍升爲防禦州移於
德勝口爲治所升貝州爲永清軍置節度觀察使以博
冀二州爲屬郡以西京留守高行周爲廣晉鄴都留守
廣晉府行營中軍使貝州防禦使王庭膺加檢校太傅
充相州彰德軍節度使廣晉府行營步軍都指揮使右

神武統軍王周爲貝州永清軍節度使甲寅以范延光爲太子太師致仕丙辰以秘書監呂琦爲禮部侍郎歸德軍節度趙在禮改天平軍節度使昭義軍節度使兼侍衛親軍馬步軍都虞候杜重威改忠武軍節度使忠武軍節度使侍衛親軍馬步軍都指揮使劉知遠改歸德軍節度使前河陽節度使兼奉國左右廂都指揮使侯益改昭義軍節度使癸亥割濮州濮陽縣隸澶州詔許天下私鑄錢以天福元寶爲文丙寅冬至帝御崇光殿受朝賀仗衛如式十二月甲戌朔以前兵部尙書梁文矩爲太子少師以鎮武節度副使符蒙爲右諫議大

夫以吏部郎中曹國珍爲左諫議大夫以前涇州彰義軍節度使李德琬爲晉州建雄軍節度使加同平章事以皇太子右金吾衛上將軍重貴爲檢校太傅開封尹封鄭王加食邑三千戶戊寅制以大寶于闐國進奉使檢校太尉馬繼榮可鎮國大將軍副使黃門將軍國子少監張再通可試衛尉卿監使殿頭承旨通事舍人吳順規可試將作少監迴鶻使都督李萬金可歸義大將軍監使雷福德可順化將軍是日詔宣令天下無問公私應有銅欲鑄錢者一任取便酌量輕重鑄造戊子以河陽潛龍舊宅爲開晉禪院邢州潛龍舊宅爲廣法禪院

龍武統軍李從昶卒輟朝一日贈太尉

永樂大典卷一萬五千六百四

二十

舊五代史卷七十七終

舊五代史卷七十七攷證

九月己酉宮苑使焦繼勳自軍前押范延光牙將馬諤
齋歸命請罪表到闕王子延光領部下士素服于本
府門俟命有詔釋罪 案歐陽史作九月己酉赦范
延光蓋併書于奉表請罪之日也

舊五代史卷七十七攷證

舊五代史卷七十八

宋司空同中書門下平章事薛居正等撰

高祖紀第四

晉書四

天福四年春正月癸卯帝御崇光殿受朝賀仗衛如式
丙午召太子太師致仕范延光宴于便殿以延光歸命
之後慮懷疑懼故休假之內錫以款密帝謂之曰無忿
疾以傷厥神無憂思以勞厥衷朕方示信於四方豈食
言於汝也延光俯伏拜謝其心遂安丁未以西京副留
守龍敏爲吏部侍郎戊申盜發唐閔帝陵己酉朔方軍
節度使張希崇卒贈太師以澶州防禦使張崇恩爲樞

密使甲寅以侍衛步軍都指揮使寧江軍節度使景延
廣爲義成軍節度使以義成軍節度使馮暉爲朔方軍
節度使乙卯左諫議大夫曹國珍上言請于內外臣寮
之中選才畧之士聚唐六典前後會要禮閣新儀大中
統類律令格式等精詳纂述俾無漏落別爲書一部目
爲大晉政統從之其詳議官宜差太子少卿梁文矩左
散騎常侍張允大理卿張澄國子祭酒唐汭大理少卿
高鴻漸國子司業田敏禮部郎中呂咸休司勳員外郎
劉濤刑部員外郎李知損監察御史郭延升等一十九
人充文矩等咸曰改前代禮樂刑憲爲大晉政統則堯

典舜典當以晉典革名列狀駁之曰作者謂之聖述者謂之明苟非聖明焉能述作若運因革故則事乃惟新或改正朔而變犧牲或易服色而殊徽號是以五帝殊時不相沿樂三王異世不相襲禮至於近代率由舊章比及前朝日滋條目多因行事之失改爲立制之初或臣奏條章君行可否皆表其年月紀以姓名聚類分門成文作則莫不悉稽前典垂範後昆述自聖賢歷于朝代得金科玉條之號設亂言破律之防守而行之其來尙矣皇帝陛下運齊七政歷契千載爰從創業開基莫不積功累德所宜直筆具載鴻猷若備錄前代之編年

目作聖朝之政統此則是名不正也夫名不正則言不順而媚時掠美非其實矣若翦截其詞此則是文不備也夫文不備則啟爭端而禮樂刑政于斯亂矣若改舊條而爲新制則未審何門可以刊削何事可以編聯既當革故從新又須廢彼行此則未知國朝能守而不守乎臣等同共參詳未見其可疏奏嘉之其事遂寢辛酉以前晉昌軍節度使李周爲靜難軍節度使是日封皇第十一妹安定郡主爲延慶長公主皇第十二妹廣平郡主爲清平長公主二月辛卯改東京玉華殿爲承福殿中書上言太原潛龍莊望建爲慶長宮使相鄉望改

爲龍飛鄉都尉里望改爲神光里從之丁酉宰臣馮道
左散騎常侍韋勳禮部員外郎楊昭儉自契丹使迴案馮
道出使之期當從五代春秋作三
年九月至四年二月始得歸也 帝慰勞備至錫賚豐

厚庚子以天和節宴羣官於廣政殿錫物有差三月癸

卯朔左僕射劉昫給事中盧重自契丹使迴頒賜器幣
如馮道等乙巳迴鶻可汗仁美遣使貢方物中有玉玃
猊寶奇貨也丙午涇州節度使張萬進卒贈太師己未
皇子開封尹鄭王重貴歸德軍節度使兼侍衛親軍馬
步軍都指揮使劉知遠忠武軍節度使杜重威並加同
中書門下平章事天平軍節度使趙在禮封衛國公庚

申遣內臣趙處玘以版詔徵華山隱者前右拾遺鄭雲
叟玉笥山道士羅隱之靈州戍將王彥忠據懷遠城作
叛帝遣供奉官齊延祚乘驛而往彥忠率眾出降延祚
矯制殺之詔齊延祚辜我誓言擅行屠戮彰殺降之罪
隳示信之文宜除名決重杖一頓配流王彥忠贈官收
葬辛酉封迴鶻可汗仁美爲奉化可汗癸亥以左龍武
統軍皇甫遇爲鎮國軍節度使張彥澤爲彰義軍節度
使夏四月壬申朔以河中節度副使薛仁謙爲衛尉卿
丙子以汝州防禦使宋彥筠爲同州節度使以護聖左
右軍都指揮使李懷忠爲侍衛親軍馬軍都指揮使領

壽州忠正軍節度使以奉國左右廂都指揮使郭謹爲

侍衛親軍步軍都指揮使夔州寧江軍節度使戊寅詔

廢長春宮使額

五代會要載原勅云同州長春宮使額宜停沿宮職務委州司制置已卯

改明德殿爲滋德殿宮城南門同名故也以華州節度

使劉遂凝爲右龍武統軍以右龍步統軍張延蘊爲絳

州刺史庚辰徵前右拾遺鄭雲叟爲右諫議大夫王筍

山道士羅隱之賜號希夷先生甲申以翰林學士承旨

兵部侍郎崔棣權判太常卿以端明殿學士戶部侍郎

和凝爲翰林學士承旨樞密院學士尙書倉部郎中司

徒詡樞密院學士尙書工部郎中顏衍並落職守本官

樞密副使張從恩改宣徽使初廢樞密院故也先是桑維翰免樞密之務以劉處讓代之奏議多不稱旨及處讓丁母憂遂以樞密院印付中書故密院廢焉丙戌以韓昭允爲兵部尙書致仕馬允孫爲太子賓客致仕房暉爲右驍衛大將軍致仕皆唐末帝之舊臣也戊子升永岳二州爲團練使額改湘川縣爲全州從馬希範之奏也五月壬寅朔帝御崇光殿受朝仗衛如式癸卯以左僕射劉昫兼太子太保封譙國公乙巳昭順軍節度事姚彥章卒升靈州方渠鎮爲威州隸於靈武改舊威州爲清邊軍戊申湖南節度使馬希範加天策上將軍

以前邠州節度使安叔干爲滄州節度使庚戌虞部郎中楊昭儉可本官知制誥辛亥置靜海軍於温州從錢元瓘之請也王子以侍御史盧價爲戶部員外郎知制誥戶部尙書崔檢卒甲寅詔止絕朝臣不得外州府求覓表狀奏薦交親乙卯升金州爲節鎮以懷德軍爲使額以齊州防禦使潘瓌爲懷德軍節度使右諫議大夫致仕鄭雲叟賜號逍遙先生仍給致仕官俸丁巳以刑部尙書姚顗爲戶部尙書以兵部侍郎權判太常卿事崔稅爲尙書左丞以工部侍郎任贊爲兵部侍郎以禮部尙書李懌爲刑部尙書以左丞盧詹爲禮部尙書以

左散騎常侍韋勳爲工部侍郎庚申廢華清宮爲靈泉
觀辛酉御史臺奏省郎知雜之時赴臺禮上軍巡邸吏
之輩咸集公參赤縣府司悉呈杖印今後年深御史判
雜上事欲依前例從之丙寅以鎮海軍衙內統軍上直
馬步軍都監檢校太傅睦州刺史陸仁章爲同平章事
遙領遂州武信軍節度使以鎮海軍興武左右開道都
指揮使明州刺史仰仁銓爲檢校太傅同平章事領宣
州寧國軍節度使從錢元瓘之請也六月辛未朔陳郡
民王武穿地得黃金數餅州牧取而貢之帝曰宿藏之
物旣非符寶不合入官命付所獲之家庚辰西京大風

雨應天福門屋瓦皆飛鴟吻俱折辛卯詔禮部貢舉宜
權停一年秋七月庚子朔日有食之西京大水伊洛渥
澗盡溢壞天津橋癸卯以華清宮使李頤爲右領軍衛
上將軍甲辰以定州節度使皇甫遇爲潞州節度使檢
校太尉以潞州節度使侯益爲徐州節度使戊申御史
中丞薛融等上詳定編勅三百六十八道分爲三十一
卷是日詔先令天下州郡公私鑄錢近多鉛錫相兼缺
薄小弱有違條制今後私鑄錢下禁依舊法壬戌以太
子少保梁文矩爲太子太保致仕閏七月庚午朔百官
不入閣雨霑服故也壬申以中書侍郎平章事集賢殿

大學士桑維翰爲檢校司空兼侍中相州彰德軍節度使以彰德節度使王延胤爲義武軍節度使尙書戶部奏李自倫義居七世準勅旌表門閭先有鄧州義門王仲昭六代同居其旌表有廳事步欄前列屏樹烏頭正門闊闊一丈二尺二柱相去一丈柱端安瓦桷黑染號爲烏頭築雙闕一丈在烏頭之南三丈七尺夾階十有五步槐柳成列今舉此爲例則令式不該詔王仲昭正廳烏頭門等制不載令文又無勅命旣非故事難黷大倫宜從令式祇表門閭於李自倫所居之前量地之宜高其外門門外綽楔門外左右各建一臺高一丈二尺

廣狹方正稱臺之形圻以白泥四隅漆赤其行列樹植
隨其事力其同籍課役一準令文壬午濮州刺史武從
諫勒歸私第受贓十五萬故也丁酉故皇子河南尹重
父妻虢國夫人李氏落髮爲尼賜名悟因仍錫紫衣法
號及夏臘二十八月己亥朔河決博平甘陵大水辛丑
以守司空兼門下侍郎平章事弘文館大學士馮道爲
守司徒兼侍中封魯國公壬寅詔曰皇圖革故庶政惟
新宜設規程以諧公共其中書印祇委上位宰臣一人
知當戊申前兵部尙書王權授太子少傅致仕己酉以
天下兵馬副元帥鎮海鎮東等軍節度使檢校太師行

中書令吳越王錢元瓘爲天下兵馬元帥王子升亳州

爲防禦使額依舊隸宋州丙辰司天監馬重績等進所

撰新歷降詔褒之詔翰林學士承旨和凝制序命之曰

調元曆九月辛未以右羽林統軍周密爲鄜州節度使

癸酉升婺州爲武勝軍額丁丑宴羣臣於永福殿契丹

使納默庫

舊作粘木孤今改正

來聘致牛馬犬腊顛騃十四

遼史會同

二年正月戊申晉遣金吾衛大將軍馬從斌考功郎中劉知新來貢珍幣丙辰晉遣使謝免沿邊四州錢幣七月戊申晉遣使進犀帶閏月乙酉遣使賜晉良馬八月乙丑晉遣使貢歲幣奏輸戊亥二歲金幣于燕京已

卯遙領洮州保順軍節度使鮑君福加檢校太師兼侍

中判湖州諸軍事辛巳相州節度使桑維翰上言管內

所獲賊人從來籍沒財產請止之詔今後凡有賊人準
格律定罪不得沒納家資天下諸州準此癸未封唐許
王李從益爲郇國公奉唐之祀服色旌旗一依舊制仍

以西京至德宮爲廟牲幣器服悉從官給

五代會要九月敕周受龍

圖立夏殷之祀唐膺鳳曆開鄴介之封乃瞻前朝載稽
舊典宜封土宇俾奉宗祧宜以郇國三千戶封唐許王
李從益爲丙戌高麗王王建遣使貢方物已丑以中書

郇國公云

侍郎平章事李崧權判集賢殿事庚寅詔停寒食七夕

重陽及十月暖帳內外羣官貢獻丙申以威勝軍節度

副使羅周岳爲給事中中書舍人李詳改禮部侍郎禮

部侍郎呂琦改刑部侍郎刑部侍郎王松改戶部侍郎

戶部侍郎閻至改兵部侍郎中書舍人王易簡充史館
修撰判館事冬十月戊戌朔故昭信軍節度使白奉進
贈太尉丙午以太常卿程遜沒於海廢朝一日贈右僕
射庚戌閩王王昶威武軍節度使王繼恭遣僚佐林思
鄭元弼等朝貢致書於宰執無人臣之禮帝怒詔令不
受所貢應諸州綱運並令林思鄭弼等押歸本道旣而
兵部員外郎李知損上疏請禁錮使人籍沒綱運可之
收林思等下獄丙辰谿州刺史彭士愁以錦蔣之兵與
蠻部萬人掠辰澧二境湖南節度使馬希範遣牙兵拒
之而退金州山賊度從讜等寇洵陽遣兵討平之十一

月甲戌以太子賓客李延範爲司農卿乙亥詔立唐高祖太宗及莊宗明宗閔帝五廟於洛陽丁丑祠部郎中知制誥吳承範改中書舍人充翰林學士翰林學士中書舍人竇貞固改御史中丞御史中丞薛融改尙書左丞尙書右丞王延改吏部侍郎尙書左丞崔稅改太常卿戊寅史館奏請令宰臣一人撰錄時政記逐時以備撰述從之

五代會要史館奏唐長壽二年右丞姚璩奏帝王謨訓不可闕文其仗下所言軍國政事

令宰臣一人撰錄號時政記唐明宗朝又委端明殿學士撰錄逐季送付史館伏乞遵行者宜令宰臣一員撰述

已卯吏部侍郎龍敏改尙書左丞己丑以太子賓客

楊凝式爲禮部尙書致仕詔建錢鑪於欒川丙申諫議

大夫致仕逍遙先生鄭雲叟卒十二月丁酉朔百官不
入閣大雪故也已亥故皇太子重英妻張氏落髮爲尼
賜名悟慎并夏臘二十庚戌禮官奏來歲正旦王公上
壽皇帝舉酒奏元同之樂再飲奏文同之樂三飲奏同
前從之歌辭不錄丙辰詔今後城郭村坊不得剏造僧
尼院舍丁巳帝謂宰臣曰大雪害民五旬未止京城祠
廟悉令祈禱了無其驗豈非涼德不儲神休未洽者乎
因令出薪炭米粟給軍士貧民等壬戌禮官奏正旦上
壽宮懸歌舞未全且請雜用九部雅樂歌教坊法曲從
之

永樂大典卷一萬
五千六百四十四

舊五代史卷七十八

舊五代史卷七十八攷證

晉高祖紀四以澶州防禦使張從恩爲樞密副使 樞密副使原本作樞密使按下文亦作樞密副使今從歐陽史及宋史張從恩傳改正

以版詔徵華山隱者前右拾遺鄭雲叟 右拾遺歐陽

史作左拾遺攷是書前後俱作右拾遺今仍其舊

以潞州節度使侯益爲徐州節度使 案宋史侯益傳

天福四年晉祖追念虎牢之功遷武寧軍節度同平章事是書不載同平章事五代會要所載天福中使相有侯益與宋史同

今後私鑄錢下禁依舊法 案歐陽史七月丙辰復禁
鑄錢是書作七月戊申

李自倫義居七世準勅旌表門閭 七世歐陽史作六
世又旌表門閭歐陽史作正月與是書作閏七月異
先有鄧州義門王仲昭六代同居 案王仲昭歐陽史
作登州人

乙亥詔立唐高祖太宗及莊宗明宗閔帝五廟于洛陽
案立唐廟于西京歐陽史作十二月與是書作十
一月異

舊五代史卷七十八攷證

舊五代史卷七十九

宋司空同中書門下平章事薛居正等撰

高祖紀第五

晉書五

天福五年春正月丁卯朔帝御崇光殿受朝賀仗衛如
式降德音應天福三年終公私債欠一切除放壬申蜀
人寇西鄙羣盜張達任康等刦清水德鐵之城以應之
癸酉湖南奏閩人殺王昶夷其族王延義因民之欲而
定之甲戌遣宣徽使楊彥詢使於契丹辛巳皇子開封
尹鄭王重貴加檢校太尉己丑迴鶻可汗仁美遣使貢
良馬白玉謝冊命也庚寅以二王後前右贊善大夫襲

鄴國公楊延壽爲太子左諭德三恪汝州襄城縣令襲
介國公宇文頡加食邑三千戶辛卯升絳州爲防禦州
癸巳以左神武統軍陸思鐸爲右羽林統軍以隴州防
禦使何福進爲右神武統軍甲午太常少卿裴羽奏請
追諡莊宗皇后劉氏爲神閔敬皇后明宗皇后曹氏請
追諡爲武憲皇后閔帝魯國夫人孔氏追諡爲閔哀皇
后從之丙申河中節度使安審信奏軍校康從受李崇
孫大裕張從于千等以所部兵爲亂尋平之死者五百
人二月丁酉朔沙州歸義軍節度使曹義全卒贈太師
以其子元德襲其位乙巳御史中丞竇貞固奏國忌日

宰臣跪爐焚香文武百寮列坐竊惟禮例有所未安今
欲請宰臣仍舊跪爐百寮依班序立詔可之仍行香之
後飯僧百人永爲定制庚戌北京留守安彥威來朝帝
慰接甚厚賜上尊酒壬子升中書門下平章事爲正二
品丁巳青州節度使東平王王建立來朝己未以中書
門下侍郎爲清望正三品諫議大夫御史中丞爲清望
正四品三月丁卯朔右散騎常侍張允改禮部侍郎辛
未宋州歸德軍節度使侍衛親軍馬步軍都指揮使劉
知遠加特進改鄴都留守廣晉尹典軍如故以兗州節
度使李從溫爲徐州節度使以北京留守安彥威爲宋

州節度使王申詔朝臣覲省父母依天成例頒賜茶藥
癸酉以青州節度使王建立爲昭義軍節度使進封韓
王仍割遼沁二州爲昭義屬郡以建立本遼州人用成
其衣錦之美也以晉州節度使李德琬爲北京留京以
潞州節度使皇甫遇爲晉州節度使是日容州節度使
馬存卒甲戌以給事中李光廷爲左散騎常侍亳州團
練使李式爲給事中乙亥相州節度使桑維翰加檢校
司徒改兗州節度使許州節度使杜重威改鄆州節度
使河中節度使安審信改許州節度使丁丑長安公主
出降駙馬都尉楊承祚戊寅詔中書門下五品以上官

於兩省上事宰臣押角之禮及第舉人與主司選勝筵
宴及中書舍人鞞鞋接見舉人兼兵部禮部引人過堂
之日幕次酒食會客悉宜廢之己卯以前樞密使劉處
讓爲相州節度使辛巳湖南遣牙將劉勅領兵大破溪
洞羣蠻收溪錦蔣三州丁亥以秦州節度使康福爲河
中節度使以徐州節度使侯益爲秦州節度使庚寅御
明德樓餞送昭義軍節度使王建立賜玉斧蜀馬甲午
詔吏部三銓聽四時選擬官旋奏不在團甲之限夏四
月丙申朔宴羣臣於永福殿戊戌曹州防禦使石暉卒
帝之從弟也禮官奏天子爲五服之內親本服周者三

哭而止從之己亥罷洛陽京兆進苑圃瓜果閔勞人也
壬寅右僕射致仕裴皞卒贈太子太保丙午詔曰承旨
者承時君之旨非近侍重臣無以稟朕旨宣予言是以
大朝會宰臣承旨草制詔學士承旨若無區別何表等
威除翰林承旨外殿前承旨宜改爲殿直密院承旨宜
改爲承宣御史台三司閣門密省所有承旨並令別定
其名庚戌以滄州節度使馬全節爲安州節度使禮部
侍郎張允奏請廢明經童子科從之因詔宏詞拔萃明
筭道舉百篇等科並停之五月癸酉宋州貢瑞麥兩歧
甲申以前徐州節度使裴從簡爲右金吾衛上將軍丙

戍安州節度使李金全叛詔新授安州節度使馬全節以洛汴汝鄭單宋陳蔡曹濮十州之兵討之以前鄆州節度使安審暉爲副以內客省使李守貞爲都監仍遣供奉官劉彥瑤奉詔以諭金全命麾下齊謙以詔送於淮夷雲夢人齊峴斬謙歸其詔於朝辛卯昭義節度使

韓王王建立薨輟朝二日冊贈尙書令

原脫六月

壬寅少府監致

仕尹玉羽卒癸卯淮南使李承裕伐李金全金全南走承裕以淮兵二千守其城甲辰馬全節自應山縣進軍於大化鎮戊申與鄂州賊軍陣於安陸之南三戰而後克之斬首三千級生擒千餘人供奉官安友謙登鋒力

戰奮不顧身全節賞其忠勇使馳獻捷書暍死於路是日削奪李金全官爵丁巳淮夷僞校李承裕率眾掠城中資貨而遁馬全節入城撫其遺民遣安審暉等兵以逐承裕擒而斬之執其僞都檢杜光鄴及淮南軍五百餘人露布獻於闕下帝曰此輩何罪皆厚給放還癸亥道士崇真大師張薦明賜號通元先生是時帝好道德經常召薦明講說其義帝悅故有是命尋令薦明以道德二經雕上印板命學士和凝別撰新序冠於卷首俾頒行天下秋七月甲子朔降安州爲防禦使額以申州隸許州丙寅安州節度使馬全節加檢校太尉改昭義

軍節度使前鄜州節度使安審暉加檢校太傅爲威勝
軍節度使丁卯湖南奏遣天策府步騎將張少敵領兵
五萬樓船百艘次於岳陽將進討淮夷也甲戌宣徽使
楊彥詢加檢校太傅充安國軍節度使乙亥戶部尙書
致仕鄭韜光卒贈右僕射戊寅福州王延羲遣商人間
路貢表自述戊子宿州奏淮東鎮移牒云本國奏書於
上國皇帝曰久增景慕莫會光塵但循戰國之規敢預
睦鄰之道一昨安州有故脫難相規邊校貪功乘便據
壘矧機宜之孰在顧茫昧以難申否臧皆凶乃大易之
明義進取不止亦聖人之厚顏適屬暑雨稍頻江波甚

張指揮未到事實已違今者猥沐睿咨曲形宸旨歸其
俘獲示以英仁其如軍法朝章彼此不可揚名建德曲
直相懸雖認好生非敢聞命其杜光鄴等五百七人已
令却過淮北帝復書曰昨者灾生安陸釁接漢陽當三
伏之炎蒸動兩朝之師旅豈期邊帥不稟上謀泊復城
池備知本末尋已捨諸俘執還彼鄉閭不惟念効命之
人兼亦敦善鄰之道今承來旨將正朝章循宥罪之文
用廣崇仁之美其杜光鄴等再令歸復尋遣使押光鄴
等於桐墟渡淮淮中有棹船甲士拒之南去不果詔光
鄴等歸京師授以職秩其戍士五百人立爲顯義都八

月丁酉帝觀稼於西郊己亥詳定院以先奉詔詳定冬
正朝會禮節樂章二舞行列等事上之事具樂志庚子
以前金州防禦使田武爲金州懷德軍節度使辛丑升
復郢二郡爲防禦使額戊午左龍武統軍相里金卒廢
朝一日贈太師己未太子太師致仕范延光卒於河陽
廢朝二日贈太師丁卯宰臣李崧加集賢殿大學士以
翰林學士承旨戶部侍郎和凝爲中書侍郎平章事丙
子廢翰林學士院其公事並歸中書舍人丁丑翰林學
士中書舍人李慎儀爲右散騎常侍以翰林學士左右
補闕李澣爲吏部員外郎以右散騎常侍趙元輔爲太

子賓客以太子賓客韓惲爲兵部尙書以右諫議大夫
段希堯爲萊州刺史甲申西京留守楊光遠加守太尉
兼中書令充平盧軍節度使封東平王戊子改東京上
源驛爲都亭驛冬十月丁酉制天下兵馬元帥鎮海鎮
東浙江東西等道節度使中書令吳越王錢元瓘加守
尙書令充天下兵馬都元帥戊戌戶部尙書姚顗卒廢
朝一日贈右僕射癸卯湖南上言福建王延羲與弟延
政互起干戈內相侵伐甲辰升萊州爲防禦使額以汝
州防禦使楊承貴領之以新授萊州刺史段希堯爲懷
州刺史丁未契丹使錫里舊作舍利
今改正來聘致馬百匹及

王鞍狐裘等

遼史會同三年三月戊辰遣使使晉乙未

遣宣徽使楊端王毗等來問起居丙辰遣使使晉丙午晉

癸亥晉遣使使賀端午五月庚辰晉遣使進弓矢甲申遣

皇子天德及檢校司徒即用和使晉六月庚子晉遣使

來見九月丙戌晉遣使貢名馬庚申晉遣使貢布十二

月丙申遣

使使晉

己酉宴羣臣於永福殿賜帛有差癸丑詔今

後竊盜贓滿者處死三匹以上者決杖配流以盜論者

准律文處分又詔過格選人等許赴吏部南曹召保委

正身者降一資注官十一月壬戌遙領遂州武信軍節

度使鎮海軍衙內統軍檢校太傅同平章事陸仁璋卒

贈太子太傅甲子滑州節度使景延廣加檢校太傅改

陝州保義軍節度使以鄭州防禦使駙馬都尉史匡翰

爲義成軍節度使戊辰曹州防禦使石贊加檢校太保
充河陽三城節度使庚午以翰林學士戶部侍郎張昭
遠爲兵部侍郎丙子冬至御崇光殿受朝賀始用二舞
帝舉觴奏元同之樂登歌奏文同之樂舉食文舞奏昭
德之舞武舞奏成功之舞典禮久廢至是復興觀者悅
之丁丑吳越國進奉使陳元亮進冬日觀仗詩一首帝
覽之稱善賜服馬器幣癸未移德州長河縣大水故也
甲申制授閩國王延義檢校太師兼中書令福州威武
軍節度使封閩國王以兩浙西南面安撫使錢元懿爲
檢校太尉兼中書令遙領廣州清海軍節度使又以恩

州團練使錢鐸爲檢校太尉同平章事遙領楚州順化
軍節度使丁亥割衛州黎陽縣隸滑州十二月壬辰朔
遙領洮州保順軍節度使檢校太尉兼侍中判湖州軍
州事鮑君福卒贈太傅丙申詔故靜海軍兼東南面安
撫制置使檢校太傅温州刺史錢弘異贈太子太傅故
吳越兩軍節度副使檢校太傅錢弘傳贈太子太師

天福六年春正月辛酉朔帝御崇光殿受朝賀仗衛如式
刑部員外郎李象上二舞賦帝覽而嘉之命編諸史冊
甲子同州指揮使成殷謀亂事洩伏誅時節度使宋彥
筠御下無恩旣貪且鄙故殷與子彥璋陰構部下爲亂

會有告者遂滅其黨乙丑青州奏海凍百餘里丙寅遣
供奉官張澄等領兵二千發并鎮忻代四州山谷吐渾
令還舊地先是吐渾苦契丹之虐受鎮州安重榮誘召
叛而南遷入常山太原二境帝以契丹歡好之國故遣
歸之戊辰詔應諸州無屬州錢處今後冬至寒食端午
天和節及諸色謝賀不得進貢壬申以左司郎中趙上
交爲諫議大夫戊寅封唐叔虞爲興安王台駘神爲昌
寧公差給事中張瑑戶部郎中張守素就行冊禮又詔
嶽鎮海瀆等廟宇並令崇飾仍禁樵採丙戌故皇第二
叔檢校司徒萬友贈太師皇第三叔檢校司空萬鈗贈

太尉皇兄故檢校左僕射敬儒贈太傅二月辛卯詔天下郡縣不得以天和節禁屠宰輒滯刑獄壬辰置浮橋於德勝口甲午詔諸衛上將軍月俸舊三十千令增至五十千戊戌以三恪汝州襄城縣令襲介國公宇文頡爲太子率更令己亥詔戶部侍郎張昭遠起居郎賈緯秘書少監趙熙吏部郎中鄭受益左司員外郎李爲光等同修唐史仍以宰臣趙瑩建修壬寅以三白渠制置使張瑑爲給事中戊申詔侯伯來朝君臣相見賞宴貢奉今後宜停起居郎賈緯以所撰唐年補錄六十五卷上之帝覽之嘉歎賜以器幣仍付史館

五代會要起居賈緯奏曰伏以

唐高祖至代宗已有紀傳德宗亦存實錄武宗至濟陰
廢帝凡六代惟有武宗實錄一卷餘皆闕略臣今搜訪
遺聞及耆舊傳說編成六十五卷目
爲唐朝補遺錄以備將來史官修述
癸丑長安公主薨
帝之長女也笄年降於駙馬楊承祚帝悼惜之甚輟視
朝二日追贈秦國公主三月甲子河中節度使康福進
封許國公乙丑右驍衛上將軍李承約卒癸酉詔天福
四年終已前百姓所欠夏秋租稅一切除放夏四月庚
寅朔湖南奏溪州刺史彭士愁五溪酋長等乞降已立
銅柱於溪州鑄誓狀於其上以五溪銅柱圖上之丙申
詔顯義指揮使劉康部下兵五百人放還淮海卽安州
所俘也已亥虞部郎中知制誥楊昭儉遷中書舍人戶

部侍郎王松改御史中丞禮部郎中馮玉改司門郎中
知制誥辛丑宰臣監修國史趙瑩奏奉詔差張昭遠等
五人同修唐史內起居郎賈緯丁憂去官請以刑部侍
郎呂琦侍御史尹拙同與編修又奏史館所闕唐朝實
錄請下勅購求從之五代會要監修國史趙瑩奏自李
朝喪亂迨五十年四海沸騰兩都
淪覆今之書府百無二三臣等近奉綸言俾令撰述褒
貶或從于新意纂修須案于舊章既闕簡編先虞漏略
今據史館所闕唐書實錄請于舊章既闕簡編先虞漏略
臣韋保衡與蔣伸皇甫煥撰述未見流傳其韋保衡裴贄合
多事或值播遷雖聞撰述未見流傳其韋保衡裴贄合
有子孫見居職任或門生故吏曾記纂修聞此討論諒
多欣愜請下三京諸道及內外臣寮凡有將此數朝實
錄詣闕進納量其文武才能不拘資地除授一官如卷
帙不足據數進納亦請不次獎酬以勸來者自會昌至
天祐垂六十年其初李德裕平上黨著武宗伐叛之書

其後康承訓定徐方有武寧本末之傳如此事類記述頗多請下中外臣寮及名儒宿學有于此六十年內撰述得傳記及中書銀臺史館日曆制勅冊書等不限年月多少並許詣闕進納如年月稍多記錄詳備請特行簡拔不限資序臣與張昭遠等所撰唐史敘本紀以綱帝業列傳以述功臣十志以書刑政所陳條例請下所司從

王寅以戶部員外郎知制誥盧價爲虞部郎中知制誥以昭義節度副使陳元爲光祿卿致仕乙巳齊魯民飢詔兗鄆青三州發廩賑貸五月庚申朔以前邢州節度使丁審琪爲延州節度使延州節度使劉景巖爲邠州節度使故皇子杲冊贈太尉進封陳王庚午涇州奏雨雹川水大溢壞州郡鎮戍三十四城甲戌北京遣牙將劉從以吐渾大首領白承福念龐里赫連功德來

朝邢州上言吐渾移族帳於鎮州封部六月丙申以前
衛尉卿趙延父爲司天監丁酉詔今後藩侯郡守凡有
善政委倖貳官條件聞奏百姓官吏等不得遠詣京闕

壬寅右領衛上將軍李頌卒贈太師甲辰迦葉彌陁國
僧啞哩以佛牙泛海而至丙午高麗國王王建加開府

儀同三司檢校太師食邑一萬戶戊午鎮州節度使安

重榮執契丹使伊喇

舊作搜刺
今改正

遣輕騎掠幽州南境之

民處於博野仍貢表及馳書天下述契丹援天子父事
之禮貪傲無厭困耗中國已繕治甲兵將與決戰帝發
所諭而止之重榮跋扈愈甚由是與襄州節度使安從

進潛相構謀爲不軌

永樂大典卷一萬
五千六百四十四

舊五代史卷七十九

舊五代史卷七十九攷證

晉高祖紀五五月丙戌安州節度使李金全叛詔新授
安州節度使馬全節以洛汴汝鄭單宋陳蔡曹濮十
州之兵討之 案五代春秋五月李金全叛附于吳
馬全節帥師討安州吳人救安州全節敗吳師克安
州金全奔吳六月放吳俘還歐陽史作五月李金全
叛六月克安州馬令南唐書作六月安州節度使李
金全來降遣鄂州屯營使李承裕帥師迎之紀月互
異

執其僞都監杜光鄴 僞都監馬令南唐書作監軍通

事舍人

尋遣使押光鄴等于桐墟渡淮 桐墟原本作桐廬據
通鑑注引九域志云宿州蘄縣有桐墟鎮自桐墟而
南至渦口則濟淮矣今改正

太子太師致仕范延光卒于河陽廢朝二日 案歐陽
史作西京留守楊光遠殺太子太師范延光攷本傳
延光本爲楊光遠推墮溺水死爲之輟朝諱之也

丁卯 案歐陽史作九月丁卯原本疑有脫字

發并鎮忻代四州山谷吐渾令還舊地 案晉逐吐谷
渾在天福六年通鑑與是書同攷天福六年卽遼會

同四年也遼史作會同三年晉以并鎮忻代之吐谷
渾來歸與是書異

甲戌北京遣牙將劉從以吐渾大首領白承福念龐里
赫連功德來朝 案通鑑四月辛巳北京留守李德
瓌遣牙校以吐谷渾酋長白承福入朝是書作五月
甲戌與通鑑異歐陽史從是書

鎮州節度使安重榮執契丹使伊喇 案遼史作二月
晉安重榮執使者伊喇是書作六月先後互異

舊五代史卷七十九攷證